



KERATAN AKHBAR

SURAT KHABAR	:	SINAR HARIAN		
TARIKH	:	19/10/2019	MUKA SURAT	: 6
JABATAN	:	UMUM		
KLASIFIKASI	:	PERHATIAN		

Ribut petir, hujan lebat peralihan monsun

SHAH ALAM – Fasa peralihan monsun yang dialami Malaysia ketika ini menyebabkan beberapa kawasan di pantai barat Semenanjung, barat Sabah dan tengah Sarawak menerima hujan serta ribut petir sejak beberapa hari lalu.

Pengarah Pusat Operasi Cuaca dan Geofizik Nasional MetMalaysia, Dr Mohd Hisham Mohd Anip berkata, dalam tempoh itu, hujan lebat hanya berlaku pada waktu petang dalam masa yang singkat di kebanyakan kawasan negeri di pantai barat dan pedalaman Semenanjung, pantai barat Sabah, kawasan barat dan tengah Sarawak.

“Kebanyakan kawasan mengalami hujan dan ribut petir pada sebelah petang serta senja menyebabkan cuaca lembap dan keadaan ini dijangka mengurangkan kesan suhu panas yang berlaku secara beransur-ansur.

“Peralihan monsun ini kebiasaannya berlaku di negeri pantai barat Semenanjung, Sabah dan Sarawak,” katanya kepada *Sinar Harian* semalam.

Menurut beliau, ketika fasa peralihan monsun itu, pembentukan awan menyebabkan ribut petir mudah berlaku berikutan tiupan angin yang lemah.

“Pembentukan awan kumulonimbus kerap berlaku di Malaysia yang beriklim tropika.

“Selain mengakibatkan hujan lebat dan angin kencang, ia kadangkala boleh menghasilkan hujan air batu,” katanya.

Katanya, fasa peralihan monsun yang membawa hujan lebat dan ribut petir dijangka tidak membawa banjir besar, sebaliknya berpotensi menyebabkan banjir kilat di kawasan yang tidak mempunyai sistem saliran yang baik.

“Keadaan itu (fasa peralihan monsun) biasanya tidak membawa kepada banjir yang besar tetapi ada kemungkinan berlaku banjir kilat sekali-sekala terutama di kawasan rendah dan kawasan bandar yang mengalami masalah longkang tersumbat serta saliran yang tidak baik,” katanya.


Justeru, beliau menasihatkan orang ramai lebih berhati-hati dan mengurangkan aktiviti luar ketika hujan lebat dan ribut petir bagi mengelak sebarang kejadian tidak diingini.

Mohd Hisham berkata, fasa peralihan monsun barat daya dijangka berterusan sehingga awal November sebelum beralih kepada monsun timur laut.

“Apabila monsun timur laut bermula, biasanya negeri-negeri di pantai timur akan mengalami hujan lebat yang berterusan dan boleh membawa banjir.

“Hujan dijangka bermula pertengahan November hingga awal Januari yang biasanya negeri di pantai timur mengalami hujan lebat sekitar bulan November hingga Januari,” katanya.

Jabatan Meteorologi (MET) mengeluarkan amaran ribut petir di negeri di Semenanjung serta Sabah dan Sarawak.



Peta yang dikeluarkan MET semalam menunjukkan kawasan bertanda biru sebagai amaran berlaku ribut petir.